

RU negara tembusi kelompok 300 universiti terbaik dunia



Idris (dua dari kanan) meraikan kejayaan semua RU negara memasuki kelompok satu peratus teratas dunia dalam penarafan QS World University Rankings 2017-2018.

Oleh Faizatul Farhana Farush Khan
ffarhana@bh.com.my

Kuala Lumpur

Hubungan baik dijalinan Universiti Putra Malaysia (UPM) dengan universiti terkemuka dunia melalui kerjasama penyelidikan berimpak tinggi dan bertaraf antarabangsa, menjadi antara faktor kejayaan universiti itu menduduki tangga ke-229 dalam penarafan Quacquarelli Symonds (QS) World University Rankings 2017-2018 yang diumumkan baru-baru ini.

UPM yang muncul

universiti kedua terbaik negara menyusuli Universiti Malaya (UM) dalam senarai dikeluarkan selepas melonjak dari kedudukan tangga ke-270 sebelum ini, turut bekerjasama dengan institusi pendidikan tersohor global bagi mempromosikan nama dan produk tempatan, sekali gus mencapai sasaran digariskan dalam penarafan itu.

Naib Canselornya, Prof Datin Paduka Dr Aini Ideris, berkata UPM sentiasa menggandakan indikator bertaraf antarabangsa yang ditetapkan seperti strategi meningkatkan jumlah pensyarah luar negara dan kualiti akademik serta pelajar.

"Peningkatan kualiti kuri-

kulum dan kebolehpasaran pelajar boleh meningkatkan reputasi serta jaringan UPM dengan industri yang menjadi bakal majikan.

Perkukuh fundamental

"Universiti ini juga memperkukuhkan fundamental dari setiap aspek akademik, penyelidikan, pensyarah, mahasiswa dan program kampus supaya layak menempatkan diri dalam QS World University Rankings," katanya.

UPM yang mencatat kenaikan prestasi lima tahun berturut-turut melangkaui 41 tangga dalam penarafan terbaru, selain memperoleh skor tertinggi dalam kalangan universiti tempatan bagi indikator Pelajar Antarabangsa dan mencapai peningkatan skor dalam tiga indikator, iaitu Reputasi Akademik, Reputasi Majikan dan Ration Pelajar Fakulti.

Prof Aini berkata, selaras visi UPM menjadi universiti bertaraf antarabangsa, kedudukan dalam penarafan antarabangsa itu membantu menilai tahap visibiliti, terutama dari aspek pengajaran, pembelajaran, penyelidikan dan inovasi.

Satu peratus teratas

Melalui pencapaian baik itu, beliau berkata, UPM positif untuk mencapai kedudukan 200 terbaik dunia menjelang 2020



UPM positif untuk mencapai kedudukan 200 terbaik dunia menjelang 2020 seiring matlamat Putra Global 200 yang disasarkan.

seiring matlamat Putra Global 200 yang disasarkan.

Sementara itu Menteri Pendidikan Tinggi, Datuk Seri Idris Jusoh, berkata peningkatan lima universiti penyelidikan (RU) negara, iaitu UM, UPM, Universiti Kebangsaan Malaysia, Universiti Teknologi Malaysia dan Universiti Sains Malaysia pada penarafan tahun ini, meletakkan kesemuanya dalam kelompok satu peratus teratas dunia daripada 26,000 universiti di seluruh dunia.

Katanya, QS World University Rankings diiktiraf The International Ranking Expert Group (IREG) dan

senarai dikeluarkan menjadi rujukan pihak berkepentingan di seluruh dunia.

Jana RM6.18 bilion

Beliau berkata, penarafan lima RU itu dinilai berdasarkan enam petunjuk prestasi utama, iaitu reputasi akademik (40 peratus), reputasi majikan (40 peratus), nisbah pelajar: pensyarah (20 pelajar), nisbah sitasi: pensyarah (20 peratus), pensyarah antarabangsa (lima peratus) dan pelajar antarabangsa (lima peratus).

Idris berkata, sistem penarafan itu turut menilai empat bidang utama, iaitu penyelidikan, pengajaran,

kebolehpasaran dan pengantarabangsaan.

"Pencapaian lima universiti tempatan ini selepas 10 tahun Kementerian memperkenalkan inisiatif mewujudkan RU bagi merangsang dan membudayakan penyelidikan, penerbitan serta inovasi negara, cukup membanggakan.

"Antara 2007 hingga tahun lalu, RU menjana sebanyak RM6.18 bilion untuk negara, iaitu 55.3 peratus Pulangan Pelaburan Penyelidikan (RoRI) daripada pelaburan awal kerajaan, iaitu RM3.98 bilion," katanya pada Sidang Media Pengumuman QS World University Rankings 2017-2018 di KPT.

info

Kedudukan lima RU Malaysia dalam QS World University Rankings

RU	2016-2017	2017-2018
UM	133	114 (naik 19 tangga)
UPM	270	229 (naik 41 tangga)
UKM	302	230 (naik 72 tangga)
UTM	288	253 (naik 35 tangga)
USM	330	264 (naik 66 tangga)